

## Script of Evening Gojri News Bulletin 14 July 2024 at 1700 Hrs

ایوننگ گو جری نیوز بلیٹن مورخہ 14 جولائی 2024

\*\*\*\*\*

یوہ آکا شوانی جموں ہے باغ علی طاہر تے عبدالمجید تیں خبر سٹو۔ پہلاں خاص خاص خبر۔

\*\*\*\*\*

- \* 1- نائب صدر جمہو ریہ جگدیپ دھنکر نے سائبر سکیورٹی نانہہ بابدو دین نالے سائبر جرائم غا متاثرین نانہہ قانونی امداد مہیا کران غی ضرورت ور زور دتو ہے۔
- \* 2- پارلیمانی مور غا مرکزی وزیر کرن رچی جو غو کہنو ہے جے نواں بنایا گیا فوجداری قانونان غو مقصد لوکاں نانہہ سزا دینو نہیں بلکہ انصاف مہیا کرانو ہے۔
- \* 3- سرکار غو کہنو ہے جے لیفٹنٹ گورنر غا اختیارات مانہہ بابدو کرن گو مقصد یوٹی نانہہ بہتر انتظامیہ مہیا کرانو ہے۔
- \* 4- تے ہرارے مانہہ کھیڈیا جان آلاٹی توانٹی مقابلان غا سلسلہ غا پنجووں تے آخیری میچ بھارت تے زمبابوے بشکار جاری ہے۔

\*\*\*\*\*

خبراں غی تفصیل نال پہلاں باغ علی طاہر۔

### Vice President

نائب صدر جمہو ریہ جگدیپ دھنکر نے بہتر ٹیکنالوجی ور مبنی سائبر سکیورٹی لیڈر شپ غا کلچر نانہہ فروغ دین غی ضرورت ور زور دتو ہے۔ جہیڑی سائبر حملان غے خلاف لڑن غی بہتر صلاحیت رکھے۔ انہاں نے خاص کر گرائیں علاقان مانہہ سائبر جرائم غا متاثرین نانہہ قانونی امداد مہیا کران غی ضرورت ور وی زور دتو۔ گذشتہ شام نویں دہلی مانہہ منعقدہ تیجی سائبر سکیورٹی کانفرنس غا اختتامی اجلاس سنگ خطاب کرتاں وان نائب صدر نے کہیو جے اک محفوظ ڈیجیٹل ماحول سنگ جدیدیت نانہہ بابدو ملن غے نال نال سرمایہ کاری نانہہ وی پُر کشش بنایو جائے گو۔ تے اس راہ غیر محسوس اقتصادی سرگرمیاں نانہہ بابدو مل سکے گو۔ سائبر جرائم غا بدھتا واقعات غو نوٹس لیتاں وان نائب صدر غو کہنو تھو جے ایجنسیاں، تحقیقاتی اداراں تے قانون دانان واسطے یوہ تشویش غو اک نووں شعبو وجود مانہہ آگیو ہے تے اس ور قانون غی خاطر تکنیکی تے انسانی مہارت غی لوڑ ہے۔

\*\*\*\*\*

### Kiran Rijju

پارلیمانی تے اقلیتی معاملان غا مرکزی وزیر کرن رچیو نے کہیو ہے جے 3 نواں فوجداری قانونان غو مقصد لوکاں نانہہ سزا دینو نہیں بلکہ انصاف مہیا کرانو ہے۔ لہیہ مانہہ میڈیا سنگ گل کرتاں وان رچی جو نے کہیو جن 3 فوجداری قانونان مانہہ بدلاؤ کیو گیو ہے وے انگریز حکومت غی طرفوں سزا دین غی نیت سنگ بنایا گیا تھا۔ جن غو مقصد چھڑو لوکاں نانہہ جرمانو کرنو تے سزا دینو تھو۔ اس توں پہلاں مرکزی وزیر چھوگلام سر لہیہ مانہہ 85 کروڑ 34 لکھ روپیاں غی لاگت سنگ تعمیر کیا گیا سینٹرل انسٹیٹیوٹ آف بدھسٹ سٹڈیز غا ثقافتی تدریسی بلاک مانہہ بھومی پوجن تقریب مانہہ وی شرکت کی۔

-----

### PM Trump Attack

وزیر اعظم نریندر مو دی نے سابق امریکی صدر ڈونالڈ ٹرمپ ور ہوا حملہ ور سخت تشویش ظاہر کی ہے۔ سوشل میڈیا پوسٹ ور وزیر اعظم مو دی گو کہنو تھو جے تشدد غی سیاست تے جمہوریت مانہہ کوئے جگہ نہیں ہے۔ وزیر اعظم نے جناب ٹرمپ غی تاولان صحتیابی

غی دُعا کی ہے۔ اُن غو کہنو تھو جے بھارتی عوام غی اس حملہ مانہہ ہلاک ہون آلا افراد غا لواحقین سنگ پوری ہمدردی ہے تے دُعا ہے جے زخمی ہون آلا افراد تاولاں صحتیاب ویں۔  
\*\*\*\*\*

### Amit Shah

مرکزی وزیر داخلہ امت شاہ نے اج اندور مدھیہ پر دیش مانہہ اک ہی روز غے دوران 11 لکھ بوٹا لان غی "ایک پیڑماں کے نام" غا عنوان سنگ وزیر اعظم نریندر مو دی غی طرفوں شروع کیگئی مہم مانہہ شرکت کی۔ جس غو مقصد ماحولیاتی تبدیلی غی للکار سنگ نپڑنو ہے۔ "ایک پیڑماں کے نام" غا عنوان سنگ وزیر اعظم نریندر مو دی غی طرفوں بوٹا لان غی یاہ مہم گذشتہ 5 جون نانہہ شروع کی تھی۔ یوہ دن عالمی یوم ماحولیات غا طور رور مانیو جا ئے۔ اس مہم غے تحت پورا مُلک مانہہ کوئی 1 ارب 40 کروڑ بوٹا لا یا جا ئیں گا۔ جن وچوں 5 کروڑ 50 لکھ بوٹا چھڑا مدھیہ پردیش مانہہ ہی لا یا جا ئیں گا۔ اس موقع ور بولتاں واں وزیر داخلہ نے کہیو جے اگرچہ مُلک مانہہ ترقی ہو رہی ہے۔ تے سہولیات مانہہ باہنو کیو جا رہیو ہے۔ ور وزیر اعظم نے اُن نانہہ ہدایت کی ہے جے ماحولیات مانہہ بہتری لیان غی خاطر آئندہ نسلان واسطے وی کم کریں۔ جہیڑو چھڑو مُلک واسطے ہی نہیں بلکہ پوری دُنیا واسطے اہمیت رکھے۔  
\*\*\*\*\*

### Khatana

ممبر پارلیمنٹ انجینئر غلام علی کھٹانہ نے لیفٹنٹ گورنر منوج سنہا غی انتظامیہ ور زور دیتاں واں کہیو ہے جے جموں کشمیر غا بقایا دور دراز علاقان مانہہ لوکان نانہہ بجلی تے پانی غی سہولت مہیا کران آلی بھلائی بہتری اسکیم جل جیون مشن تے سو بھا گیہ اسکیم غو فائدو دتو جا ئے۔ اک بیان مانہہ بی جے پی غا ممبر پارلیمنٹ نے کہیو جے جموں کشمیر غا بہت سار بسنیکاں واسطے یہ دوئے اسکیم زندگی غا معیار نانہہ بہتر کرن غو وسیلو ہیں تے اجوں وی کئی دور دراز علاقان توڑی اس اسکیم غو فائدو نہیں پُجیو ہے۔ انہاں نے ضلع ریا سی غا گلاب گڑھ، ضلع کشتواڑ غا مڑواہ، سب ڈویژن تے ضلع پونچھ، راجوری، ڈوڈھ تے رامبن غا کئی علاقان غو ذکر کیو جت ان اسکیمان غو نفاذ نہیں ہووے ممبر پارلیمنٹ نے امید غو اظہار کیو ہے جے انتظامیہ ان دور دراز بقایا علاقان مانہہ لوکان نانہہ پین غا پانی تے بجلی غی سہولت مہیا کراوے گی۔  
\*\*\*\*\*

### Poonch Industrial

سرحدی ضلع پونچھ مانہہ صنعتان غے متعلق پروجیکٹان غا باہدہ واسطے ضلع انتظامیہ پونچھ نے صنعتان تے سیاحت نال تعلق رکھن آلی آکائییاں غا سلسلہ نانہہ کار گزار بنان غی خاطر اک سہولتی مرکز قائم کیو ہے۔ مقامی لوکان نے انتظامیہ غا اس قدم غو خیر مقدم کیو ہے۔ تے اپنی نوعیت غا پہلا ایسا قدم نال لوکان نے امید لائی ہے جے اس نال مقامی معیشت بہتر وے گی۔ اس سہولتی مرکز غا قیام بارے مزید تفصیل پیش کرتاں واں اسسٹنٹ کمشنر رونیو قدیر الرحمن نے آکاشوانی نال گل کرتاں واں اس طرح کہیو۔۔۔ بانٹ۔  
\*\*\*\*\*

### Kishtwar Haat

کشتواڑ قصبہ غا مرکز مانہہ سیلانیاں، یا تریاں تے ات آن آلا دوجا لوکان واسطے ڈی سی کشتواڑ ڈاکٹر دیوانش یا دُو نے گذشتہ روز کشتواڑ ہاٹ تے ٹی آر سی کشتواڑ بازار غو افتتاح کیو۔ ات بولتاں واں ڈی سی موصوف نے کہیو جے اس غا افتتاح نال مقامی ہنر منداناں،

کساناں تے کا روبا ریاں نانہہ ات غی پیدا کی گئی بے مثال چیزاں جن مانہہ مشہور کشتواڑی زعفران، پاٹری زیرا، مڑواہ غا راجماش وغیرہ شامل ہیں غی نمائش تے ان نانہہ فروخت کرن غو موقع ملے گو۔

\*\*\*\*\*

یہ خبر تم آکا شوانی جموں تیں سن رہیا ہیں خبراں غا باقی حصہ عبدالمجید۔

LG Powers

جموں کشمیر سرکار غو کہنو ہے جے کل وزارت داخلہ غی طرفوں انتظامی امور غے متعلق ضابطاں غی وضاحت با رے جا ری کی گئی نوٹیفیکیشن غو مقصد یوٹی نانہہ بہتر انتظامیہ مہیا کران غے قابل بنانو ہے۔ اس معاملہ ور کجھ سیا سی جماعتاں غی طرفوں ظاہر کیا گیا تحفظات تے اعتراضات غے بعد جموں کشمیر سرکار غو یوہ رد عمل باندے آہو ہے۔ سرکار غو کہنو ہے جے مرکزی وزارت داخلہ غی طرفوں جا ری کی گئی اس نوٹیفیکیشن سنگ جموں کشمیر تنظیم نو قانون سال 2019 غے تحت مہیا کرایا گیا اختیارات غا توازن مانہہ کو ئے بدلاؤ نہیں کیو گیو ہے۔ سرکار ی عہدیداراں نے اس معاملہ ور وضاحت دیتاں واں کہیو ہے جے لیفٹنٹ گو رنر قانون ساز اسمبلی نانہہ حاصل اختیارات غا دائرہ غے باہر اپنا اختیارات غو استعمال کریں گا۔ یہ معاملہ آل انڈیا سروسز اینٹی کو ریشن بیورو تے کجھ ہو ر معاملہ جہڑا لیفٹنٹ گو رنر غی صوابدید مانہہ شامل ہیں ور لیفٹنٹ گو رنر نانہہ قطعی اختیار حاصل ویں گا۔

\*\*\*\*\*

Jatinder Singh Udhampur

مرکزی وزیر مملکت ڈاکٹر جتندر سنگھ نے اج کہیو ہے جے وزیر اعظم نریندر مو دی غی سربراہی مانہہ سرکار مستقل مزاجی نال لوکاں نانہہ بہتر خدمات ان غا گھراں توڑی پجان غی وعدہ بند ہے۔ اڈھم پور تیں آکاشوانی نامہ نگار نے دسیو ہے جے ضلع انتظامیہ تے پنچائتی راج اداراں نال جائزہ میٹنگ غی صدارت کرتاں واں وزیر نے کہیو جے قطار غا آخری آدمی توڑی ترقی باہدہ غا کم پجایا جائیں۔ جیسو کہ وزیر اعظم غو تصور ہے۔ ترقی باہدہ غا جا ری کماں مانہہ پیش رفت غا جائزہ میٹنگ غے دوران نمائنداں غا تعاون نال کم کریں تے بھلائی بہتری غی اسکیمان با رے دوردراز علاقاں مانہہ لوکاں نانہہ جانکا ری دین گا سلسلہ مانہہ کیمپ منعقد کر رہی ہے۔

\*\*\*\*\*

Permission

جموں کشمیر سرکار نے سرینگر مانہہ 8 محرم نانہہ تعزیه غو محرم غو جلوس کڈن غی اجازت دے دتی ہے۔ یوہ جلوس گورو بازار بڈشاہ کدل تے ایم اے روڈ تیں ہوتاں ڈل گیٹ ور اختتام پزیر ہو جائے گو۔ یا دگا ر حسینی کمیٹی غی گذارش موصول ہون تے قانون نافذ کرن آلی ایجنسیاں غی طرفوں منظوری تیں بعد سرکار نے لگاتار دوجے سال وی یاہ اجازت دتی ہے۔

\*\*\*\*\*

Poonch Muharram

کر بلا غا شہیداں غا اعزاز مانہہ محرم غی 7 تا ریخ نانہہ شیعہ برادری غا لوکاں نے بیتے روز پونچھ مانہہ تعزیه غو جلوس غو اہتمام کیو۔ آکا شوانی نامہ نگار نے دسیو ہے جے امام بارگاہ پونچھ مانہہ اختتام پزیر ہون تیں پہلاں یوہ تعزیه غو جلوس پونچھ غا سینڈی گیٹ،

چوک بازار، مام بازار تے دوجا بازاراں تیں ہوتاں واں گزریو۔ اس دوران جلوس مانہہ شامل لوکاں نے کالا کپڑا پایا وا تھا۔

\*\*\*\*\*

### Khari Block

ضلع انتظامیہ رامبن نے سمپورنتا ابھیان غے تحت کھڑی بلاک مانہہ زیابطیس مرض با رے تشخیص غو سلسلو شروع کیو ہے۔ رامبن تیں آکا شوانی نامہ نگار نے خبر ٹوری ہے جے بلاک مانہہ 3 ہزار آبا دی ہے تے پچھلے ہفتے شروع کی گئی جانچ غے دوران 30 بہراں تیں زیادہ عمر غا 3 ہزار 1 سو مرداں تے 2 ہزار 4 سو کالسریاں غی زیابطیس با رے جانچ کی گئی۔ آکا شوانی نامہ نگار نال گل کرتاں واں مقامی لوکاں نے انتظامیہ غا اس قدم غو خیرمقدم کرتاں واں اس طرح کہیو۔۔۔ باٹ۔۔

\*\*\*\*\*

### Cricket

مرداں گا ٹی ٹوانٹی کرکٹ مقابلاں مانہہ میزبان زمبابوے غے خلاف بھارت کرکٹ ٹیم 5 ٹی ٹوانٹی کھیڈ مقابلاں غو اخیر 5 ووں مقابلو کھیڈ رہی ہے۔ کچھ چر پہلاں زمبابوے نے ٹاس جیت غے گیندبازی کرن غو فیصلو لیو ہے۔ بھارت کرکٹ ٹیم غا کپتان چھبمن گل غی سربراہی مانہہ پہلا 4مقابلوں وچوں 3 مقابلہ جتیا ہیں۔ آخری خبر ملن توڑی بھارت نے 9 اُوراں مانہہ 3 وکٹاں غا نقصان ور 64 دوڑ بنا لی تھیں۔

\*\*\*\*\*

### Weather

محکمہ موسمیات نے جموں خطہ مانہہ 14 تیں 20 جولائی تک بدل چھایا رہن تے وقفہ وقفہ نال بارش تے گرج چمک ہون غی پیشنگوئی کی ہے۔ کچھ جگہیں 16 تیں 17 جولائی ناہہ پہاری بارش ہون نال لاس پسی پین، پتھر پین غو وی امکان ہے۔ محکمہ نے مزید پیشنگوئی کرتاں واں دسیو ہے جے 21 تیں 23 جولائی تک بہت ساری جگہیں رُک رُک غے گرج چمک نال بارش ہون تے آسمان ور چڑ چڑیا رہن گو امکان ہے۔

-----

اس غے نال ہی خبراں غو یوہ بلیٹن ختم ہوؤ۔